

**GURE AITA SANTU LEON AMAIRU-GARRENARI.<sup>1</sup>**

Chimista ta trumoya  
orei beltz artian!  
Ekaitza, aizia, bagak  
ichaso aserrian!  
Eta belak galduta  
olatu mendian  
San Pedroren ontziya  
dabill trabesian.

Baña Jaunaren itza  
egikaria da,  
alan ontzi santua  
ondatuko ez da.  
Sortu du salbatzeko  
biartzan bezela  
lurrak ikusi duen  
gizon aundiyena.

Jainkuen izenean  
biotza beterik  
igo da ontzira prestu  
olatu gañetik.  
Artu du eskuan lema...  
bultza du gogorrik...  
eta ontziya ibiltzen  
asi da zuzenik.

Gizon santuen itza  
umill aditzian  
aizeak eta ekaitzak  
jun dira nastian...  
baretu da ichasoa...  
eta bitartian  
sartu da Eleiz-ontziya  
portuan bakian!

¡O Leon Aita maite  
Erromako izarra!  
Eleizaren argiya  
Egiyen indarra!  
Zure jakinduriyen  
badago biarra  
zabaltzeko munduan  
gure Fede zarra!

Bedeinkatu zaitzala  
Jainkuak betiko,  
lenengo lurrean, ta  
zeruetan gero;  
eta gorde zaitzala  
urte askorako  
kristandade guzien  
zori onerako.

JUAN V. ARAQUISTAIN.

(1) V. nota de la pág. 1.